



桂勝第四卷

南溪山

從闔雞山北水口入是為南溪山以溪名諸

峰迴合四壁峭懸烟翠黝蒼著衣如染唐李


公渤愛其映帶溪流特於玄巖白龍多所穿

築白龍之前溪水澄碧中有泉出是為新泉

亦公之所鑿自殫精思製序綴詩及去桂之

際留題致意後或改玄巖曰觀音轉玄巖而

上有巖曰泗州自僧人巖居者取所奉彼教





內兩大士號之至宋東南諸巖始以郡人劉仲遠學道其中名其上巖曰劉仙下則穿雲緣穿雲東北行以有仲遠足迹名曰仙迹劉仙之旁閣出巖際名曰通明其前有道觀長松落落椽牀小憇頗有蕭疎之狀然似不若白龍玄巖俯映寒漪流靚芳藻花猶池植鳥似家禽隔水茆居砧杵間發不知身在莽蕩之野也已

虞衡志云白龍洞在南溪平地半山中翕有大石屋由屋右壁入洞行半途有小石室劉仙巖在白龍洞之陽仙人劉仲遠所居也石室高廣出半山間

詩

唐李渤題玄巖 玄巖麗南溪新泉發幽色  
巖泉孕靈秀雲烟粉崖壁斜峯信天挿竒洞  
固神闕窈窕去未窮環迴勢難極玉池似無  
水玄井昏不測仙戶掩復開乳膏凝更滴丹  
砂有遺址石徑無留跡南眺蒼梧雲北望洞

庭客蕭條風烟外爽朗形神寂若值浮丘翁  
從此謝塵役

宋呂愿忠 翠峯倚空蹲怪石輪囷夾道卧  
長松白龍應已冲天去巖竇巋然有故蹤

假守呂叔恭拉機宜劉子思監郡朱國輔  
經屬陳朝彥自中隱巖巖過白龍洞叔恭之

子大鈞侍行紹興甲戌季春之七日

朱晞顏 慶元改元寒食日陪都運寺丞遊  
白龍洞時牡丹盛開小酌巖下夕陽西度並

轡而歸

小溪漱碧響潺潺路入龍宮杳靄間佳節謾  
添新白髮故人賴有舊青山花時幾共湘南  
醉萍跡何當嶺北還歸路聯鑣紅日晚多慙  
龍卧白雲閑

胡寺丞和 懸崖怪石水潺潺宜有神龍隱  
此間窮勝不妨歸險洞尋春那止看羣山攀  
龍行即天邊去躍馬聊同野外還好景良辰  
適相會一尊且共水雲閑



曾宏正 老仙乘白龍飛入白雲鄉巖前刻  
舟痕遊子常彷徨清商韻風松疑有笙鶴翔  
我欲往從之居然塵鞅韉酒闌下山去回首  
空慨慷

臨江曾宏正淳祐癸卯閏望同三山常挺  
臨川吳湜羽士李可道來遊子公邁侍

李曾伯 老龍昔未蛻嘗蟄此山中霖雨春  
疇足風雲夜壑空兩崖高下倚一徑往來通  
不願千金劑惟祈百穀豐

淳祐庚戌覃懷李曾伯因勸農來此得四  
十字是日微風扇和輕雲閣雨千峰翠滴  
四野綠秀枝禽對語春意駘蕩無極徜徉  
久之緩轡而去賓佐四明史偉之廬陵曾  
垓眉山楊埏東嘉林拾三山卓炎子廬陵  
王真孫長沙胡盛盱江周子榮潼川楊牧  
之清湘滕處厚續至

文

唐李渤玄巖序 桂水灘山右匯陽江數里

餘得南溪口溪左屏外崖巘闐麗爭高其孕  
翠曳烟邈迤如畫左連幽野園田雞犬疑非  
人間沂流數百步上巖巖下有灣壤沮洳因  
導為新泉山有一洞九室西南曰白龍洞橫  
透巽維玃骨如玉西北曰玄巖洞曲通坎隅  
晴眺灘水玄巖之上曰丹室白龍之右曰夕  
室巽維北梯險至仙窟北又有石室參差研  
豁延景宿雲其洞室並乳溜凝化詭勢竒狀  
俯而察之如傘如輦如欒樞支撐如蓮蔓藻

井左睨右瞰似簾似幃似松偃竹裊似海蕩  
雲驚其玉池玄井嵐飈迴環交錯迷不可紀  
從夕室梁溪向郭四里而近去松衢二百步  
而遙余獲之若獲荆璆與隋珠焉亦疑夫大  
舜遊此而忘歸矣遂命發潛菽深磴危宅既  
翼之以亭榭又韻之以松竹似讌方丈似昇  
瑤臺麗如也暢如也以溪在郡之南因目為  
南溪兼賦詩以紀之寶曆三年三月七日序  
郭顯卜居銘 皇宋開國幾二百年金虜犯



順衣冠南遷桂獨宜人歲無嵐煙溪山之勝  
間出神仙泌源郭顯志慕精專卜築巖下鑿  
井耕田榜耜歸去養真自然燒煉丹藥徜徉  
林泉峩峩巖壁排空插天紹興己巳勒銘記  
焉 栖霞子書

題名

白龍山在桂城之東南登山之西而至其洞  
深廣可數楹石之穹隆隱然若神物化去而  
留其跡洞之名蓋亦舊矣元祐己巳二月八

日上黨苗子居歷陽高時仲金陵李師正黎  
陽吉鄰幾乘暇以遊愛其佳趣且忘其歸因  
刻於石以志其來爾會稽關蔚宗題

上饒盧潛禮濟北段徵之毘陵胡茂方同郡  
樓元弼武夷葉振卿紹聖乙亥秋九月中澣  
遊

湘陰彭子民陶達王長孺洛陽席貢從詔使  
按部還桂同遊白龍洞己卯春

公輔公密侍親遊春來此政和辛卯季春旬

休日

南郡唐晉德携家同遊男鋼銖銓錫侍行政

和二年三月二十七日題

李景言王子舉渭之昭淳熙丙申立夏日同遊

陳正仲銓訖之官王景醇林亨仲飲餞於乙

卯仲冬

慶元丁巳立秋後三日同幕集觴於此豫章  
王岳次山溫陵趙庚叔初長沙陳克仁壽卿

長樂陳昂中定謨臨川楊文明仲藻

慶亭翟子埜歲在庚申重五休務日携家往  
尋巖洞之勝時也暑風清微涼氣襲人徜徉  
終日不知夕陽之在山也

長沙李勁正臣胡持正雅叔唐嶸次山朱佐  
君輔蕭仲仁元之嘉定甲子端陽日憇此

嘉定辛未中元後四日計臺臨汀楊公子直  
復出按未歷之郡憲臺括蒼管定夫帥守濟  
北李誠之載酒白龍洞留款先是去夏六月



大暑公初行郡亦嘗觴此夫仕而南多鄙夷  
其民怠忽迺職使者間畏炎毒未嘗一跡按  
部公連歲犯暑殆遍走二十四州尊年精明  
人所難及父老有迎拜而問者曰使家壯也  
何用而見用於遲晚近也弗留而肯留於遠  
外吾儕嶺民懷私惠而勤勞使家一至於斯  
公呼而謝之曰上有命老弗容辭遠弗敢憚  
懼我之矜汝者或有未至而汝之憐我者姑  
置勿言遂一咲登車既行勒茲語於巖石用

告我同志云

東萊呂祖昇長沙王濟美自千山觀聯騎來遊

嘉熙初元正月三日

南溪山三篆字

玄巖洞三隸字

觀音巖三真字

劉仙巖

宋李師中留題大空子隱居

可道非常道

真空本不空荒郊自生草閑地又栽松無欲  
更何慮有為終必窮風雲上天去老子信猶

龍

曹輔遊劉道人巖 故老能將舊事傳仙翁  
蹤跡尚依然方知物外壺中景隱隱烟霞有  
洞天

梁子美和 神仙靈異古今傳窮理修真本  
自然遺址宛存疑谷口蒼崖喬木聳青天

呂愿忠 平湖小隊出郊墟盡日登臨據隼  
旗聞道仙人尸假去尚應猶學世間書

假守呂叔恭拉機宜劉子思監郡朱國輔

經屬陳朝彥紹興甲戌季春七日來遊

趙夔桂山諸巖歌 秦皇開郡為桂林古號

名邦五嶺陰山琢玉筴攢萬疊江分羅帶繞  
千尋青青四顧列羣山生自天工巧若鑄玲

瓏拔地聳層秀崢嶸嵯峨星斗間其中有巖  
十二所伏波靈顯存祠宇顏公讀書窟室中

疊綵北山如列布何年龍隱冲霄去鱗鬣形  
模鑿石路仙人劉公飛升時巖壁宛然遺舊

題穿雲仙跡次左右



虛道氣多南溪白雉聽經生人類蕭寺豐碑  
有元記信知一性無不通石竇陰陽苔蘚蒙  
西南中隱尤勝絕穿處得名因呂公曾公程  
公皆舊跡遺愛在民傳古昔沉沉巖谷有餘  
光炎方勝槩神難藏週迴不遠郭郭下輪蹄  
追賞何忙忙

又桂山諸洞歌

宜人之地少陵詩閱玩前

賢詞意奇爛然五詠非虛語位壓坤方占一  
維青青四顧列羣山生自天工巧若鑿玲瓏

拔地聳層秀崢嶸嵯峨星斗間其中有洞十  
二所七星山下栖霞府日月華君顯跡靈遇  
者當時鄭冠卿歸到人間已三載仙洞光陰  
時未改至今舊記傳無窮玄巖蟠螭聞白龍  
一泓澄碧寒潭瑩水月圓明下翠峰枕城樓  
觀環俯視綠鎖喬林春日媚秦碑柳記已難  
觀灘水南流泛渺漫慶林巽穴玄風出華景  
高明隱丹室西方虛秀貫山腰南華朝陽風  
景饒夕陽北牖通仙徑白雀嘉蓮池淥淨許

多佳致卒難題留與詞人賡雅詠

漳川先生徧遊諸景故作是歌以總之紹  
興甲戌中秋南溪郭顯勒石穿雲巖將仕  
郎劉振書

張孝祥劉真人贊 河目甚口須髯怒張人  
貌而天者耶其骨已朽其人不死與天地齊  
年者耶山高谷深變化成空一咲相從惟我  
與公 乙酉十月朔書付巖中道士文道華  
使刻之石

題名

晉陽路質夫桐廬方務德紹興己巳二月十  
四日同來住巖道民郭顯勒石

提點刑獄公事延平張維經畧安撫使歷陽  
張孝祥以 會慶節祝雲壽於西山資慶

寺飯已登超然亭遂遊中隱巖白龍洞劉公  
巖以歸客長樂鄭顥江文叔吳鑑俱來乾道  
元年九月二十二日

嘉定癸酉先瑞慶節之一日經畧安撫管湛



提點刑獄方信孺轉運判官陳孔碩既斬旬  
萬壽於道釋宮因探洞過劉仙巖是日秋色  
澄霽

穿雲仙跡兩巖各有三楷書題巖名

灑山人曰白龍玄巖其序與詩體氣高妙頃  
於郡志復得一銘云李公所為銘曰桂之有  
山潛靈億年狀如騰雲戟列劍攢巖之有洞  
窈窕鬱盤虎掛龍懸形狀萬端旁馳杳冥仰  
踏噴坼玉落磬墜幽聲晝寒巴陵地小別有

洞天文籍之圖吾何有焉酒一卮兮琴一曲  
玄巖之下可以窮年毋論此銘是否出公手  
匡廬二室皆有公隱迹不彼之思而此是美  
雖謂為嵩廬之匹可也山勝以人人勝以名  
風操文雅高世如公是謂不朽南溪隱山何  
其幸哉長有公也劉先生果能乘龍跨鳳遊  
戲雲間與方下視世以為埃濁何有於一山  
金堂玉室乃其高蹈紫書赤文寔彼玄秘則  
巖鑄金液還丹金玄之歌與夫張平叔之贈

皆刺語已又何有於他趙賢良贈余先生歐陽  
晦夫記唐少卿事舉不敢錄非曰毀之直以未  
游其藩故爾李公師中有種竹記特為戰具設  
呂公渭傳劉先生養氣湯方之二者治戎惠民  
儻最要乎則余志山者非山所豫亦毋庸志之矣  
頃得元志乃知此銘渤仲兄涉所製郡新志謬以  
為渤而余不之改抑以見日者攬筆時設疑非妄  
新志之不可盡信此其一也庚寅仲春灘山人識

桂勝第四卷

桂勝第五卷

伏波山

山東劃江巖亦東嚮自非風雨晦冥初景微  
射先燭巖室漸晃潭壑孤峯羣木如出潭裏  
亦巖居川觀之麗矚也且無他道可入非舟  
莫達故游舸多集其下唐伏波廟在郭東北  
二里去山較遠宋元豐間游者題作湫波取  
麓遏瀾迴故云任呂賦詩於巖曰玩珠不似  
後人相循還珠已也或云還珠亦宋人為桂



帥清德之頌蓋比孟嘗珠去復還焉以其時  
合浦隸桂部其意則美惜無所據山後則桂  
城東北雉堞交加故西一面界在城中東北  
有蒙亭遺址亭詩與記并鐫山壁又癸水光  
月兩亭今廢題名內有龍石在木龍渡去山  
里許水中有石龍狀可羣飲其上巖門又有  
試劍石亦鑿空伏波為之者

風土記云伏波廟在郭中之東北二里是東  
漢伏波將軍馬援之祠也

虞衡志云伏波巖突然而起且千丈下有洞  
可容二十榻穿鑿通透戶牖傍出有懸石如  
柱去地一線不合俗名馬伏波試劍石前浸  
江濱波浪洶湧日夜漱齧之

詩

宋章峴 江瀾洄洑嚙山根山裂巖開石室  
存溺鬼夜呼千嶂黑蟄龍晨起一川渾金沙  
試決通泉脉翠壁閑題破蘚痕三伏幾人逃  
畏暑豈惟河朔有清樽

崔靜和韻 古木纏溪出 根四時香火廟  
空存人家曉聚鳧鳴亂水怪夜翻星斗渾靈  
洞仙遊雲自鎖陰崖龍去石生痕幸同軒從  
乘餘興酣醉清時酒一樽

任續賦玩珠巖 山林自空閒遊人事幽討  
岫幌與雲關來跡可堪掃良維矗孤峯玉簪  
倚天杪桂水琉璃碧洄洑下縈繞豁研巖穴  
深蚪龍雙天矯坤倪露幽秘造化殫奇巧勝  
槩當眼無何方覓蓬島悠悠世俗情是非苦

膠擾水中蟹何罪徒勞愠心悄人厄困无妄  
礫石埋幽竅風月幾年恨山光慘蘿葛星郎  
大嶽孫長城隱南表戎旃整且暇高情恣登  
眺郊垆擁小隊一見顏色愀舊觀俄頃復洞  
戶天重曉傷心日月道人世幾番老山川不  
相似歲久依然好呂巖標強名往事人能道  
孟公謾驚坐子夏冠非小桃符錄餘慶邨勝  
城濼兆冥數今乃驗常情定誰考哦詩紀真  
石聊侑芳樽醪



呂愿忠和韻 朝野樂昇平園林窮勝討快  
雨洗塵埃秋山淨如掃游鯨聚江灣饑鳥集  
木杪羣岫鬱崢嶸一水翠繚繞雲頭蒼狗變  
龍蛇亂天矯巖洞真奇崛造物逞天巧近在  
堂奧間超然類三島暫捨簿書忙何時脫紛  
擾靜聽黃栗留一聲還復悄麗譙去咫尺跬  
步即幽窈斷崖暗蒼蘚喬木菽蘿葦山腹有  
遺祠隱然見華表荀輿訪崇臺空曠縱遐眺  
八桂困樵蘇嘆息心為恹任侯三蜀秀冰壺

湛春曉有藥駐朱顏可以長不老雄篇頃刻  
成舉座悉稱好憂玉副鳴球士夫喜傳道五  
嶺類觀東一覽衆山小呂巖何興廢事固有  
前兆新詩刻翠岷異日可稽考玩珠紀勝遊  
聊復醉清醪

宗道傳 銅柱威聲凜百蠻肯貪糗載溷溪  
山無人為起文淵問端的珠還薏苡還

朱晞顏 天斲神剡不記年洞中風景異塵  
寰江波蕩漾青羅帶崖石虛明碧玉環地接



三山真蹟在天連合浦寶珠還重來恍似乘  
槎到慙愧雲門夜不關

方信孺 歸舟多載小江春重訪東巖舊  
痕挿水峭崖猶有路垂天怪石本無根金華  
仙伯真知己薏苡將軍足斷魂安得北山公  
可作倩渠移取向家園

魯宏正癸水亭

危亭倚巖隈聲名叶地識

時浮桂藕香永絕戈甲侵敗柳裊烟絲枯荷  
立霜枋呼童理吳榜日月數乘興

蒙亭倡和長句

浚儀張洵

桂林山水冠衡湘蒙亭正在

灘水旁清流洄洑眩波光高崖古木爭蒼蒼  
下有芰荷滿橫塘面面風來面面香新詩一  
咏酒一觴爽氣渾如秋氣涼酒闌巖下踞胡  
牀汲泉煮茗沉煙長從容談咲聲琅琅水光山  
色增輝芒東山蘭亭各一方風流無追謝與  
王回頭塵事皆茫茫為計不若行樂良恨我  
到此情難忘遙指白雲思故鄉



江東尚用之 江亭勝槩冠三湘仁智所樂  
皆其旁翠岫俯映青羅光上有喬木摩穹蒼  
亭下川濶覆銀塘水面風來咲語香騷人相  
值喜飛觴雄辯清談五月涼飲餘相與坐方  
牀論文日暮興何長佳篇疾讀韻琅琅直疑  
星斗煥光芒格高調古說竒方況復筆法追  
二王事業無窮嘆茫茫丹鉛點勘策非良與  
公致道心可忘浩歌直造無何鄉

晉江呂源

九溪灘水接瀟湘萬壑千巖羅

水旁七星高聳生輝光連天一色皆蒼蒼倚  
江景物似錢塘況有萬戶新醅香古洞相對  
舉清觴文淵遺迹徒悲涼安得石枕與藤牀  
夢想昔人風味長滿車蕙苾勝琳琅流傳千  
載事微芒男兒生即志四方將軍異代猶封  
王感時撫事心茫茫顧我豈有籌策良報國  
志願不敢忘此身未暇歸江鄉

三吳李彥

桂江繚繞通湖湘佳山四插江  
之旁嵐光滴翠漾波光岸頭秀木皆青蒼誰



人築室枕西塘新荷敲風柄柄香君嘗招我  
來携觴登臨樂臆生清涼倏思伏波離空牀  
且及尊前飲興長紛劇雄辯聲何琅客傳俗  
事江亭芒蠻歌蚤曲咲遐方應無夢怪楚襄  
王但驚歲月去茫茫報國宜多為畫良功名  
未白何時忘此心疇敢憶家鄉

邵武葉宗嚮

我行幾許踰沅湘直抵八桂

灘水旁一山倒影搖溪光秀色不借草木蒼  
茲亭構勝俯回塘野花風遞羅綺香巖前伏

波航羽觴一洗塵思生清涼疑有仙人白玉  
牀壺中景迴日月長步此仙籟音琅琅世間  
名利真毫芒此景不獨冠南方恨不築室輕  
侯王回首塵迹空渺茫瞥去未必計非良其  
如樽酒情難忘恍然一夢五雲鄉

附巖間二詩

范成大勸駕詩

維南吾國最多儒聳觀迢

迢赴隴書竹實秋風辭穴鳳桃花春浪脫淵  
魚月宮移種新栽桂江水朝宗舊鑿渠况有



龍頭坊并在明年應表第三間

桂林曹鄴詩云我向月中收得種為君移  
向故園栽今年用故事移桂正夏進德一  
堂又復朝宗渠水以符文章應舉之記趙  
觀文王世則兩人皆魁天下今狀元坊存  
焉故拙句中并及之淳熙元年秋九月

朱晞顏詩有序

洞底石間得枯木一株花

葉咸無而枝幹峭拔如峴山晉栢蓋石之  
精英凝結而成光澤瑩潔不減冰玉扣之

其聲鏗然珊瑚不足道以是知海物惟錯  
其中亦何所不有但世人未之見爾因成  
鄙句刻之八桂堂下巖石間以識歲月云  
慶元改元小春吉日

天教海若效珍祥不與千林春競芳擲地遺  
音清夏玉凌雲直幹凜凝霜誰浮鯨海星槎  
到猶帶蟾宮月桂香冶葉浮光掃除盡堅高  
直欲共天長

文

宋李師中蒙亭記 桂林天下之勝處茲山水又稱其尤而在城一隅荒穢不治若無人知者數千百年間豈天秘地藏不以示人意必有仁智者然後能樂蓋性情自得之也經畧吳君嘗為諫官以言事罷不復遂來歿方既安邊靜民而後及此師中覽而壯之又因斯民之樂名其亭而繫以詩詩曰凡物之蒙在人亦昧既有見焉其跡難晦斯亭之成景物來會江山之勝相與無際鳧鷖在水或在

於潯中洲蒲蓮迤邐靜深巖壑沉沉雲氣長陰自公以暇來燕來臨同民之樂而無醉飽之心嘉祐七年八月二十日尚書戶部員外郎直昭文館知桂州嶺南路經畧安撫吳及上石是時師中以度支員外郎為轉運使黃邦彥蒙亭記 紹聖改元秋八月天子以龍圖閣胡公帥桂林公素負才業敷歷中外所至有聲故治桂凡再葺邊境告寧乃得遊山水間訪其昔所嘗聞今所未見者則伏波



巖之蒙亭出焉先是嘉祐中經畧吳公即巖之左以為亭名蒙漕使李公記之而饒於巖之崖亭久埋廢記亦湮滅一日憲使梁公出其家舊所藏蒙亭記以觀焉由是益知其亭之詳巖在城東北隅茂林修竹間有徑寂然而幽循山而轉石門磴道迤邐趣雅如在壺中卻立仰視巖石翠峯歷乎江水之湄洞宇嵌空可以容賓從而列豆觴亭遺基僅存公斥基而新之凡此皆前日之荒涼岑寂隱晦

而蔽蒙今則變而為超絕殊偉之雄觀蒙其顯矣

方信孺寶晉米公畫像記 寶晉米公世居

太原後徙襄陽自公始定居潤州以宣仁后

恩補秘書省校書郎洽光尉 入淮南幕

改宣德郎知雍丘縣 監中嶽廟授漣水軍

發運司勾當公事 檄發入為奉常博

士知常州不赴管勾洞霄宮知無為軍復召為書畫院博士權禮部員外郎知淮陽軍瘁

生於首謝事不許卒於官

年 月

葬丹徒長山下信孺頃過滄光訪公遺跡得北山養疾篇及 石刻 來桂林復

得僧紹言詩序及伏波巖與潘景純同游石

刻 公嘗尉臨桂秩滿寓居西山資慶寺

頗與紹言游故有此作其他蹤跡則缺如也

至於序中云書於桂林 堂今亦失所在豈

舊尉 耶公作畫史 始尉官桂林而是

時文章翰墨已足以高跨千古然蔡天啟誌

公墓書滄光不及臨桂豈所謂名 者臨桂

中耶抑先臨桂後滄光天啟所書畧及

之耶公之孫 公遺文如北山養疾篇紹

言詩序等作皆逸焉豈公時 次偶未見

此 耶公 碑皆書熙寧七年今去此且

一百二十餘載 其聲名與天壤相終始

於 先 游桂林者或未必知其詳信孺

將漕於 公之曾孫 秀實為靜江府

支使藏公自作小像有小米題字 其游山



時

此刻之伏波巖公題名之

左且高宗御製碑 像贊冠焉併 公平

於下方

舊游使來者尚可以

想像其凌雲御風之高致云嘉定八年八月  
旦朝奉郎廣南西路轉運判官莆田方信孺  
記其小影之上有高宗御製贊曰襄陽米芾  
得名能書六朝翰墨漁獵無餘骨與氣勁妙  
逐神俱風姿亦然縱覽起予旁又注有先南  
宮戲自作此小像真跡今歸御府友仁書友

仁芾之子世稱小米者

題名

知桂州兼經畧安撫陸詵提點刑獄公事余  
藻轉運判官孔延之兵馬鈐轄白均徐印新  
知鬱林州姚原道經畧司勾當公事劉恕治  
平二年立夏後二日會於此藻題

南陽達夫會稽蔚宗清江志康熙寧壬子八  
月望日同遊東巖

潘景純米黻熙寧七年五月晦同遊

龍石會人龍圖閣待制知桂州曾布子宣轉  
運使尚書度支郎中直集賢院陳倩君美副  
使殿中丞苗時中子居提點刑獄太常博士  
劉宗傑唐輔提舉常平秘書丞齊諶子期管  
勾常平前江山縣丞劉誼宜夫元豐二年六  
月初三日同游泐波巖

建安陳倩吉水彭次雲歷陽齊諶吳劉誼元  
豐三年十二月二十四日同游泐波巖後二  
日大梁和斌獨游王軾題

曲江譚揆弟拱抃湟川蕭汝朗同游紹聖丁  
丑孟秋二日文初題

朝請大夫直龍圖閣知桂州兼經畧安撫胡  
宗回醇夫朝奉大夫轉運副使程節信叔朝  
散郎提點刑獄梁子美才甫奉議郎提舉常  
平譚揆文初累會泐波東巖茲巖勝絕在桂  
林洞穴之上其蒙亭之本末景物之交會已  
載經畧司管勾機宜文字黃邦彥之記云紹  
聖三年十月二十二日管勾書寫機宜文字



胡義修奉命題

路分程子立被命西邕無將黃忱君錫餞別  
於蒙亭時元符己卯孟夏既望

鄱陽程節信叔曲江譚揆文初臨川劉蒙齋  
明全魏董遵守道廬陵曾鎮次山自八桂堂  
過伏波巖啜茶遂遊龍隱洞辛巳清明前二  
日謹題

乙未元日端臣隻遊

曹聖邁黃彥 劉秉文李端臣躑躅青驄綠

綠楊櫨芳蒞挹滄瀾與春工相忘無何鄉政  
和丁酉絕煙節

清源劉鎡逢時膠州蔡懌樂道晉江呂汴子  
會祥符馮元震亨之襄陵侯材晉卿蒼溪王  
蕃子宜自湘南樓泛舟過湫波巖避暑抵暮  
而歸宣和己亥六月十六日

李昇之譚振尚肅之黃鐸同游

桂林富有巖穴而盛暑易於來游者唯東巖  
冠之宣和庚子六月二日三衢毛子嘉率天

台周文虎睢陽張君原四明林芑民巴陵黃  
師心三衢徐伯材會飲於此翌日天台周彥  
作復携酒與昨日諸公偕來獨文虎伯材不  
至而宜陽吳廷貺與之

建安練山甫補官宣和乙巳寒食前二日携  
家來遊子宗袞宗元宗 孫應侍行甥潘希

孟奉命書

經畧安撫蔡懌同提點刑獄尚用之轉運判  
官黃鐸轉運判官曹邁提舉常平王舜舉

訪使者練山甫早飯靈隱過曾公巖栖霞風  
洞程公巖烹茶晚會於八桂狀波巖抵暮而  
歸時宣和乙巳季春初十日題

晉江呂成之詣樞府稟議紫洲李域建安呂  
著長沙李服休都嶠陳覺湘潭吳芾飲餞於  
狀波巖時靖康初元季夏四日

孫仲益自 山還晉陵桂帥率二漕憲車餞  
於八桂堂劉立道陳景淵董令叔趙少隱紹  
興四年十月二十一日



潮陽劉昉方明自蜀還鄉過桂林寓八桂堂  
治舟狀波巖下追念昔為兒童侍先子官於  
此邦始至以政和乙未之秋而其去以宣和  
乙亥之春今三十年恍如一夢感歎之餘因  
識巖壁庶使後有考焉男汶渭溱孫男駒騎  
鸞鵬鴻外孫葉騏侍行紹興戊辰六月中澣  
方明以戊辰六月念八日登舟東歸翌日解  
維泊雉山又翌日聞命復帥湖南遂還八桂  
辭不獲命改元而北以十月二日啓行赴鎮

是用再勒於前題之左方

浚儀張璩温之被命前來賜經畧施大資止  
八桂堂五日復還武林因暇縱步來觀是巖  
紹興丙子末伏前一日

賜下有三字似夏樂窩豈施有所居名之  
御書遣賜又恐涉謬故不具書

拱甫鄭子禮挈家來遊隆興甲申中秋日林  
得之置酒喜豐堂劉子思滕子昭蔡濟忠張  
安國林德光同集乾道元年臘月

宋公玉歸豫章王壽卿姚周卿田子謩張子  
真子斐程善道黃德制王儀之滕彥真飲餞  
於此乾道己丑六月十七日

秦舜卿李南夫淳熙甲午重陽日來游

淳熙丙申三月九日王千秋袁清之官泰寧

王登叟李壽言劉李靜翁徐體仁官達卿

鄭陳席珍謝長卿李子呂伯餞於

癸水亭千中千乘與焉

方信孺楊志李閔祖嘉定間同游

嘉熙改元初伏後一日長沙雷文瑞祥仲趙  
師鐸舜臣虞舜臣寅之劉應定直甫羅仲孺  
巨卿

黃岡徐敏子銜命措度南州館穀巖側四明

戴炎長沙韓夢發寶婺周翦星渚馮弼外孫

上饒尤日新侍時淳祐丙午仲春下澣

淳祐丙午立冬後七日廬陵劉受祖之橫槎

惠祖之蒼梧艤舟伏波巖下

蘭谿趙立德成以寶祐甲寅歲閏六月十有



一日携家東歸，艤舟還珠洞。至二十一日，游徧諸巖洞，即行。

長沙胡德新盤叔泛灘歸湘，猶子克紹同資。中郭又新居安及鄉人周德明清叔、梁世賢國佐鍾罄子浚、鄭益謙遜伯、飲餞桂水亭。裴回巖下，咲談竟日。執別煙雨中。寶祐乙卯元宵後一日。

覃懷李曾伯長孺以淳祐己酉來牧是邦。越十年再開制閩，屢至此洞，每輒煮泉淪茗。裴

回竟日，令人起清斯濯纓之想，不知身在飛鳶點點墮水處也。蓋簾山帶水勝絕天下，而此洞又居簾帶之勝，舊有癸水一亭，因城築令更為之，男杓杞子孫國華侍景定庚申首夏二日謹識。

眉山朱景行以咸淳戊辰十二月三日登舟於此。

吳興陶定安世來游，甲申冬十一月初張公位張唐輔吳正禮同游。

劉舜舉張子容子直子安胡宗周同來庚寅  
三月中澣

靜江軍三大字 集賢殿修撰熙河蘭岷路  
經略安撫兼知熙州鄱陽鍾傅書寶文閣待  
制知桂州兼廣南西路經畧安撫使鄱陽程  
節上石

正夏堂三大字隸書 吳郡范成大立睢陽  
杜易書

還珠洞三大字或曰張孝祥書

灘山人曰伏波功烈著在嶠南及壺頭沒而  
蒼葭之謗興去征南歲月頗遠顧獨令東巖  
蒙斯號謬矣比考或為頌桂帥之言與尹氏  
志符謂張維以張孝祥更之孝祥故有朝陽  
亭棠陰閣兩記美維而維假此并張公洞荅  
孝祥亡足疑者第所在壁峭潭深抄榻憚險  
無從得其本觀之為快也當伏波軍行時亦  
未出此道不然武谿之吟何所發之即邳離  
入越亦從桂陽下匯水武水出臨武匯水云



在匹白漢書作滄水出声道為便新息故導  
用焉乃鑿道及他兵間或經此前輩令議祀  
兩伏波不知邳離曾未涉境有其舉之新息  
是已柰何邳離云乎范之勸駕無關於山以  
序有朝宗渠先之以祖道終之以信孺渠繫  
不細朱之異木得之山下故附見之光月癸  
水兩亭詩僅存曾之一餘諸蕪詞不敢槩入  
蓋有以哉

桂勝第五卷

